

## Канон святому апостолу Павлу, глас 8.

### Песнь 1

**Ирмос:** *Посеченный несекомаго пресече, и виде солнце землю, юже не виде, лютаго врага вода потопи, и непроходимое проуде Израиль, песнь же воспевашеся: Господеви поим, славно бо прославися.*

**Я**коже сущая нарицаая не сущая Христос Божественным разумом, Павле всеблаженне, Той из матерня чрева тя избра понести пред языки Божественное Его Имя, еже паче всякаго имене: славно бо прославися.

**Б**удущее возвещая тебе сияние благочестия, Павле, и лести очищение, Христос явлься на горе молниезрачен, очи убо помрачает плотския, душевныя же вразумляет Троическим разумом: славно бо прославися.

**О**брезание убо совершая осмодневное и ревнитель отеческих, Павле, преданий, от семени еврейска, колена Вениаминова, по закону же фарисей явлься, вменил еси вся уметы и Христа приобрел еси: славно бо прославися.

**Богородичен:** **Ч**истая Мати Бога Вседержителя, от царскаго колена, Владычице, израстши и едина Бога, всеми царствующаго, рождшая плотию паче естества, от бед мя спаси, Сыну Твоему поюща: славно бо прославися.

### Песнь 3

**Ирмос:** *Ты еси утверждение притекающих к Тебе, Господи, Ты еси свет омраченных, и поет Тя дух мой.*

**Т**ы камень основания верным душам положился еси многоценен, краеуголен Спаса и Господа.

**П**авле всеблаженне, на основании твоём, молися, добродетелей всехвальных наздатися светлости.

**В**сегда мертвость Иисусову на твоём теле совершенно, Павле, обносяй, сподобился еси истинная жизни.

**Богородичен:** **Т**я вси стяжахом прибежище и стену нашу, христиане, Тя славословим немолчно, Безневестная.

### Песнь 4

**Ирмос:** *Всел еси на кони, апостолы Твоя, Господи, и приял еси рукама Твоима узды их, и спасение бысть еждение Твое верно поющим: слава силе Твоей, Господи.*

**В**седе, якоже лев, яровидно погубляя Христову Церковь, Савл иногда, ят же быв Божественным гласом Агнца Божия, Егоже гоняше, стадо яко пастырю вручает.

**Х**отяй просветити вселенную омрачается, Анания же к сему послася, душевное же просвещение даяй и телесное от Божественнаго явления, сосуд избран показав того.

**П**авлом достойно Дамаск напояется: от сего бо, якоже от рая иногда, вод Божественных сей произыде великий источник и упои всю Богоразумием независтно землю.

**Богородичен:** **Н**изложи сильныя со престол Господь, Дева и Мати якоже рече, алчущия же Божественных благ исполни, верую зовущия: слава силе Твоей, Господи.

## Песнь 5

**Ирмос:** *Просвети нас повелении Твоими, Господи, и мышцею Твоею высокою Твой мир подаждь нам, Человеколюбче.*

**Т**ы истинную избрал еси, Павле, похвалу, Крест Царя Христа присно нося, якоже победу, апостоле.

**Т**ебе еже жити, Христос, и еже умрети, приобретение изрядно: любовь бо сраспаялся еси Распеншемуся нас ради, Павле преславне.

**Р**адуетися воистину о Господе, Павле честный, изшед из телесе и отшед ко Христу, Жизнодавцу Богу.

**Богородичен:** **М**оли присно Сына Твоего и Бога нашего, Неискусобрачная Марие Чистая, послати нам, верным, милость.

## Песнь 6

**Ирмос:** *Молитву пролию ко Господу и Тому возведу печали моя, яко зол душа моя исполнися и живот мой аду приближися, и молюся, яко Иона: от тли, Боже, возведи мя.*

**В**ся пренебрег красная мира, уязвлен Владычною любовью и общаго спасения желанием, свидетельствовати тому изволив, о Павле блаженне, и ныне о вселенней молися.

**Я**ко изрядный Владыце подобник и в Того одеян, Павле, воистину всем был еси всяк, да вся приобретаеши и спасеши люди, и спасл еси яко воистину, Христу уловив концы.

**Д**остойно тебе дарова Христос житие, апостоле Павле, на Небесех: пребывающаго бо zde не возжелал еси града, блаженне, верен слугитель быв и строитель таин Его.

**Богородичен:** Призре на Тя Господь, мое обновляя существо, яко Силен, величия сотвори, Богородительнице, якоже рекла еси, Всенепорочная, и спасе мя Тобою из тли Бог мой, яко Милосерд.

## **Кондак, глас 2**

**Т**вердыя и Боговещанныя проповедатели, верх апостолов Твоих, Господи, приял еси в наслаждение благих Твоих и покой: болезни бо оных и смерть приял еси паче всякаго всеплодия, Едине, сведый сердечная.

## **Икос**

**У**ясни мой язык, Спасе мой, разширив моя уста и исполнив я, умили сердце мое, да, яже глаголю, последую и, яже убо учу, сотворю первее: всяк бо творя и уча, рече, сей велик есть. Аще бо глаголю, и не творю, яко медь звенящая вменюся; темже рещи ми подобная и творити полезная даруй, Едине, сведый сердечная.

## **Песнь 7**

**Ирмос:** *На поле Деире иногда мучитель пещь постави на мучение богоносных, в нейже три отроки песнословяху Единаго Бога, троично воспеваху, глаголюще: отцев Боже, благословен еси.*

**Б**ысть, Христе, печать и венец апостолов Твоих, иже напоследок званный времен, тщанием же всех превозшед, с нимже людие церковнии поют Тебе: отец наших Боже, благословен еси.

**А**ще и гонив первее Церковь Твою Павел узник, но премину древнюю дерзость Твоею ревностию последи. Собра бо, Христе, языки, зовущия: отец наших Боже, благословен еси.

**Т**ы из Иерусалима проповедав всем Евангелие, объят же окрест всю землю, Павле, даже до конец Иллирика, уча, взывал еси: отец наших Боже, благословен еси.

**В**о ужасе взят быв, третие достигл еси Небо, пребогате, и, услышав неизглаголанная словеса, вопиеша: слава превышнему Отцу и Сыну, сияние же сопрестольно испытующаго яве Духа Божия глубины.

**Богородичен:** Якоже на руно дождь, на Тя сниде, Дево, Христос Бог, и Плотносец из Тебе пройде, соединяя прежде разстоящая, мир на земли и на Небеси даруя: отец наших Боже, благословен еси.

## **Песнь 8**

**Ирмос:** *На горе святей прославльшася и в купине огнем Приснодевы Моисеови тайну явльшаго, Господа пойте и превозносите во вся веки.*

**С**растворися любовью Твоею Павел, добрым же изменением изступи: не себе бо живяше славный, имяше же, Щедре, живуща Тя в себе во вся веки.

**Т**ы обручил еси, якоже невесту, представи Жениху Христу Церковь: невестовождь бо сея показался еси, Павле Богоносе. Темже тя славит во вся веки.

**П**одвизался еси добрым подвигом и, скончав течение твое законно, сокровище веры соблюл еси. Темже венцев, Павле, сподобился еси правды.

**Богородичен:** Радуйся, престоле огнезрачный Господень; радуйся, Невесто Невестная, Дево, радуйся, облаче, Солнца возсиявшая правды, Егоже превозносим во вся веки.

## **Песнь 9**

**Ирмос:** *У*ставы прешла еси естества, Содетеля заченши и Господа, и дверь спасения миру была еси. Тем Тя, Богородице, непрестанно величаем.

**Т**воим поклоняемся веригам, яже за Христа, яко злодей, носил еси, язвы же, Павле, облобызаем, яже на славнем твоём и победоноснем носиши телеси.

**Н**ыне разрешился еси, апостоле, ко Иже тобою непрестанно Желаемому, с Нимже яко служитель водворяся, непрестанными мольбами твоя рабы к себе привлецы.

**Н**ыне никакоже в гаданиих, ниже в зеркале Христос тебе зрим есть, лицом же паче зрится к лицу, совершенно тебе разум открывая Божества.

**Богородичен:** **Т**ы, Пресвятая Богомати, похвала Христовых апостолов была еси, мучеников же слава и пророков основание. Темже, вернии, Тя вси достождно величаем.

## **Светилен**

**А**постолов вси верх воспоем, Петра и Павла Божественныя, вселенныя светильники, проповедники веры, богословныя трубы, учений сказатели, церковныя столпы и разорители лести.